



## 煨番薯

行入便利商店，俾壁脣个箱仔項有燒燒个焙番薯。烏色卵石頂焙等香香个番薯，番薯皮煨到燥爽燥爽、敲核敲核，番薯个糖膏對番薯皮个縫仔項凝出來了，還錫人食哪！看到人忍毋核，當下就買佢兩條，趕燒食落肚，還幸福个味緒哪！

做細人仔該下，寒天个臨暗頭，姐公洗好身會在廳下看電視、焙厥燒爌爌仔个火囡；姐婆在灶下盤洗身水，佢就在灶空前掌灶空壁角个番薯，細心細意个摺番薯埋在火屎肚壅等，看顧等佢、莫分火燒著。姐婆洗好身，噴香个番薯也煨好了。園入姐婆个間房，拏等姐婆用大手帕包好个水鴨嫲，食等甜香个煨番薯，看阿婆梳髻鬃花、聽阿婆講古，係寒天个臨暗頭盡幸福个味緒。

有一年暑假，禾頭田割忒了，田項个泥翻好、還畝放水，大哥渡等歸陣仔老弟老妹去阿公个田項煨番薯。兩兄弟挖窟仔、疊泥團，搥好一隻番薯窯；五姊妹團草結、撿樵，準備起火。火起起來了，大哥講佢來疊樵、佢兜去寮就做得，火燒到猛猛猛，大哥就係大哥！六個老弟老妹在田坵肚打嘴鼓、唱歌仔、走相逐仔、搥射蟲蜈。大火過，出火炭了，放入盡平心、盡惜孫仔个阿婆擇過个一條條仔平大平大、靚靚个番薯，封口、等番薯熟。二哥看火煙在泥團縫項蓬蓬起，拿起挖泥个鑊仔摺泥團撇撈，還對窯頂撇幾下下佢，一息煙都無出了！大家先轉屋，等番薯翕熟。時間差毋多了，偲佢來去開窯了。還慶哦，番薯全部都有熟透心、乜無一條臭火煙，堵好熟、又略略仔出糖膏个番薯，實在有罈香！毋過，全部都係扁个，可見二貨仔个鑊仔，異有力，連九十歲个阿太看著大號老蘿蔔乾樣仔个番薯都好笑！毋過，該窯扁扁个煨番薯，有佢佢兄弟姊妹仔一生人感情个記念。

看著煨番薯，會看著姐婆燒暖个灶下、會看著田坵肚一大陣兄弟姊妹仔个嘻嘻嘻嘻，對佢來講，係幸福个味緒。看著煨番薯，異多老人家會想起走空襲時代个番薯簽、會想起鮮鮮湯湯个糜飲；燒爌爌仔、香出味个白飯，對佢兜來講，正係幸福个味緒。該對您來講，哪項食雜，園等有您幸福个記號，有您幸福个味緒呢？

作者：彭瑞珠

### ☆詞彙學習☆

- 【敲核敲核】lud` fud lud` fud：果皮與果核、【團草結】ton` co` gied`：紮草木枝葉當燃料。果肉易分離，指果子成熟或事情容易處理。  
 【鮮鮮湯湯】xien` xien` tong` tong`：稱液體稀薄。  
 【水鴨嫲】sui` ab` ma`：橢圓形金屬熱水袋，【嘻嘻嘻嘻】he` he` ngag` ngag`：歡笑嬉鬧。今為橡膠製。  
 【食雜】siid cab：日常飲食。  
 【禾頭田】vo` teu` tien`：稻田。

### ☆文法學習☆

- 【該】ge：那。(1)表示遠指，相對於「這(ia)`」；(2)表示語氣的轉折或承接。  
 例1：該本書係若个無？（那本書是你的嗎？）  
 例2：佢想食大麵，該你呢？（我想吃麵，那你呢？）